






Chikin an Milipiid

-  Winny Asara
-  Magriet Brink
-  Georgette McGlashen
-  Jamaican Creole
-  Level 3





Chikin an Milipiid a did fren. Bot dem alwiez inna kompitishan wid wananeda. Wan die dem mek op dem main fi plie futbaal fi si uu a di bes plieya.



Dem go a di futbaal fiil an staat dem giem. Chikin did faas, bot Milipiid did faasa. Chikin kik faar, bot Milipiid kik faara. Chikin did staat get kraas.



Dem mek op dem main fi av penalti shuut-out. Fos, Milipiid a did guol kiipa. Chikin skuor onngl wan guol. Den a did Chikin torn fi plie guoli.



Milipiid kik di baal an skuor. Milipiid jribl di baal an skuor. Milipiid bok di baal an skuor faiv guol.




Chikin did wel beks se shi luuz. Shi neva tek luuzin gud. Milipiid did staat laaf kaaz im fren did a fos op arself.



Chikin did so beks dat shi uopm ar biik waid an swola op Milipiid.



Jos az Chikin a waak go a ar yaad, shi bok op inna Mada Milipiid. Mada Milipiid aks ar se, "Yu si mi pikni?" Chikin neva se notn. Mada Milipiid did kansorn.



Den Mada Milipiid ier wahn likl vais. "Elp mi mama!" di vais did a baal. Mada Milipiid luk roun an lisn gud. Di vais did a kom fram outta di chikin.



Mada Milipiid baal out se, “Yuuz yu speshal powa mi pikni!” Milipiid kyan mek wahn bad smel an wahn bad ties inna yu mout. Chikin staat fi fiil sik.



Chikin belch. Den shi swola an spit. Den shi sniiz an
kaaf. An kaaf. Di milipiid di sik stomok!



Chikin kaaf so til shi kaaf op di milipiid we did inna ar beli. Mada Milipiid an ar pikni kraal go op inna wahn chrii go aid.



Fram dat taim, chikin an milipiid ton enimi.



Storybooks Jamaica

global-asp.github.io/storybooks-jamaica

Chikin an Milipiid

Written by: Winny Asara

Illustrated by: Magriet Brink

Translated by: Georgette McGlashen

This story originates from the African Storybook (africanstorybook.org) and is brought to you by [Storybooks Jamaica](https://global-asp.github.io/storybooks-jamaica) in an effort to provide children's stories in Jamaica's many languages.



This work is licensed under a Creative Commons
[Attribution 3.0 International License](https://creativecommons.org/licenses/by/3.0/).